



#### Anugerah Naib Canselor Nobat 105 Pelajar



*Muhamad Asyraf Che Mat menerima cenderamata dan sijil daripada Prof. Datuk Dr. Nik Mustapha R. Abdullah.*

**BANGI, 18 April** – Seramai 105 orang pelajar Universiti Putra Malaysia (UPM) dinobatkan sebagai penerima Anugerah Naib Canselor UPM ke-10 baru-baru ini.

Naib Canselor UPM, Prof. Datuk Dr. Nik Mustapha R. Abdullah berkata daripada 237 pemohon yang layak dipertimbangkan bagi menerima anugerah 2008/2009 tersebut, hanya 105 terpilih setelah dinilai dua jawatankuasa panel.

"Masing-masing terpilih berdasarkan pencapaian cemerlang dalam akademik dan ko-kurikulum universiti serta mempamerkan ciri-ciri kepimpinan yang unggul.

"Anugerah ini merupakan satu dorongan kepada pelajar yang akan mengorak langkah untuk bersaing dengan bakal graduan dari institusi lain di alam pekerjaan," katanya ketika merasmikan majlis tersebut di Hotel Equatorial.

Beliau berkata penglibatan aktif dalam aktiviti kokurikulum dapat mendedahkan pelajar kepada pelbagai potensi diri yang berharga dan mampu menyokong pembangunan intelektual pelajar secara berkesan.

Dr. Nik Mustapha berkata majlis tersebut turut dihadiri oleh kedua ibu bapa pelajar tersebut sebagai penghargaan kejayaan ibubapa mendidik sehingga menjadi pelajar yang cemerlang.

Wakil penerima ANC, Muhamad Asyraf Che Mat, pelajar tahun akhir Bachelor Pendidikan Bimbingan dan Kaunseling berkata sokongan ibu bapa, rakan-rakan dan pensyarah UPM banyak membantunya untuk berjaya dengan cemerlang di UPM.

"Di sini kami menimba banyak pengalaman seperti kemahiran komunikasi dan menyertai aktiviti kokurikulum untuk memantapkan diri," katanya.

Wakil penerima ANC lain, Yom Nurul Akma Abd Lahsan yang akan menyambung pelajaran ke peringkat sarjana berkata beliau berterima kasih dengan pensyarah yang banyak membantunya semasa berada di UPM.

"Saya akan bergraduat pada bulan Ogos dan akan menyambung pelajaran ke peringkat sarjana pada hujung tahun ini," katanya.

ANC diberikan kepada pelajar tahun akhir pengajian yang mencapai Purata Nilai Gred Kumulatif (PNGK) sekurang-kurangnya 2.75 dan tidak pernah dikenakan tindakan tatatertib.

ANC juga menilai pelajar yang berbilang dan memperlihatkan prestasi unggul dalam mana-mana aktiviti kepimpinan, amal kebajikan, sukan, aktiviti ketahanan fizikal dan mental, seni budaya, kreatif dan kursus serta bengkel.



*Prof. Datuk Dr. Nik Mustapha R. Abdullah bergambar bersama penerima Anugerah Naib Canselor pada majlis tersebut.*

Disediakan oleh Seksyen Media dan Publisiti, Bahagian Komunikasi Korporat, UPM.